



**PARIMET UDHËHEQËSE PËR ETIKËN DHE ESTETIKËN  
E PUBLIKIMEVE NË REVISTËN SHKENCORE  
“BULETINI I SHKENCAVE GJEOLIGJIKE”**

## **HYRJE**

"Buletini i Shkencave Gjeologjike", është Revistë Shkencore e njohur nga Ministria e Arsimit e Republikës së Shqipërisë dhe botohet nga Shërbimi Gjeologjik Shqiptar, që prej vitit 1964, fillimisht nën titullin "*Përmbledhje Studimesh*" (periudha 1964 - 1980; ISSN), e më pas nën titullin aktual (ISSN 0254-5276; për botimin elektronik ISSN 2306-9600). Qëllimi i botimit të tij është t'i shërbeje zhvillimit të shkencës gjeologjike nëpërmjet botimit në faqet e tij të artikujve në fushën e gjeologjisë dhe fushave të afërta me të.

"Buletini i Shkencave Gjeologjike", drejtohet nga Bordi Editorial, i cili miratohet prej Drejtorit të Përgjithshëm të SHGJSH-së.

Bordi funksionon sipas Statutit të Bordit Editorial të "Buletini i Shkencave Gjeologjike".

### **A. Politika të përgjithshme**

Buletini i Shkencave Gjeologjike përfaqëson një revistë shkencore, që boton artikuj të shqyrtuar në një proces "*external peer-review*" (me ekspertizë të jashtme), pra ata botohen pasi kanë kaluar në disa faza të shqyrtimit të kriterëve, vlerësimit dhe përmirësimit të cilësisë shkencore dhe paraqitjes së artikullit.

Në këtë revistë mund të botohen artikuj nga fushat e gjeoshkencave, të cilat mund të paraqesin të reja të kërkimeve shkencore, apo sinteza të punimeve të kryera në kohë të mëparshme, por që japin përfundime të reja si rezultat i këndvështrimit të ri prej autoreve, dhe që klasifikohen si "Case Study".

Autor i artikujve mund të jetë kushdo, shqiptar apo i huaj, që parqet një artikull të pranueshëm sipas kriterëve të vlerësimit të Bordit Editorial, hartuar sipas "Kërkesave ndaj autorëve".

Në faqet e Buletinit ndalohen replikat denigruese me karakter personal, por pranohen diskutimet në formë artikujsh, të cilat kundërshtojnë apo përkrahin ide të artikujve të botuar në faqet e Buletinit të argumentuara këto me fakte analitike, grafike dhe teorike. Në këtë rast autori i replikuar ka të drejtën e një kundërepike e cila nuk kalon më shumë se 4 faqe të shkruara, duke përfshirë këtu dhe figurat e referencat, si dhe paraqitjen dy gjuhëshe shqip dhe anglisht të punimit.

### **B. Gjuha e përdorur në tekstin e artikullit**

Artikujt e botuar në Buletin, pranohen në dy gjuhë, në gjuhën shqipe dhe atë angleze.

### **C. Etika e Bordit Editorial**

1. Bordi Editorial ka detyrë të shqyrtojë çdo artikull, pa paragjykuar, apo diskriminuar autorët për arsye siç janë: gjinia, raca, kombësia apo prirja seksuale, ç'ka do të përbënte dhe shkelje të paraparë nga Ligji Nr. 10 221, datë 4.2.2010 "*Për mbrojtjen nga diskriminimi*".
2. Artikujt shqyrtohen sipas afateve kohore të parashikuara.
3. Bordi Editorial ka detyrë të respektojë pavarësinë intelektuale të autorit.

4. Bordi Editorial përjashton nga mbledhja anëtarët që kanë konflikt interesi në materialin e paraqitur.
5. Bordi Editorial duhet të mbrojë të drejtat e autorit që ka paraqitur artikullin dhe të mos lejojë përdorimin e materialeve të artikujve në mënyre abuzive gjatë kohës kur ato janë të dorëzuar për botim.
6. Anëtarët e Bordi Editorial kanë të drejtën të bëjnë kritikën e tyre konstruktive dhe të udhëzojnë autorët me qëllim përmirësimin e cilësisë së artikullit.

#### **D. Respektimi i të Drejtave të Autorit, nga autorët e artikujve**

1. Autorët e artikujve, janë të detyruar të respektojnë normat për të Drejtat e Autorit, të njohura prej ligjit Nr. 9380, datë 28.4.2005 *"Për të drejtën e autorit dhe të drejtat e tjera të lidhura me të"*, me ndryshimet e mëvonshme, amendimet e tij dhe normat e reja ligjore që mund të miratohen në të ardhmen.
2. Për këtë qëllim të gjitha imazhet, fotot, figura apo grafikët e sjella për botim duhet të jenë të shoqëruara me autorësinë origjinale.
3. Autorët e artikullit, përpara botimit të artikullit nënshkruajnë një formular, i cili vërteton respektimin prej tyre të ligjit të lartpërmendur. Refuzimi për të dhënë këtë deklaratë sjell mosbotimin e artikullit pavarësisht vlerave të tij.
4. Përdorim i imazheve, fotove, figurave apo grafikeve të bëra publike, nga autorë të mëparshëm dhe të përdorura nga autorët e artikujve si bazë e materialit të tyre grafik me përmirësime nga ata vetë (vepra të prejardhura), është i lejueshëm në bazë të neneve 27, 28, 29 të ligjit Nr. 9380, datë 28.04.2005, sepse autorët e artikujve të "Buletini i Shkencave Gjeologjike", nuk botojnë me qëllime fitimi, pra ata duhet të jenë pasuruar me të dhëna të reja dhe citim të autorësisë origjinale dhe të përmirësuesit.
5. Çdo përmendje e ideve të autorëve të ndryshëm, citohet në tekstin e artikujve dhe renditet në listën e referencave siç udhëzohet në *"Kërkesa ndaj autorëve"* në Statutin e Bordit Editorial.

#### **E. Ekspertiza e jashtme e artikullit**

1. Çdo artikull, pas dorëzimit, i nënshtrohet diskutimit në mbledhjen më të afërt të Bordit Editorial. Bordi e shqyrton për të dhënë një vlerësim paraprak për gjëndjen dhe vlerat e artikullit. Mbasi Bordi Editorial bie dakord se artikulli është në përputhje me parametrat e kërkuar dhe i plotëson kushtet e një artikulli shkencor, ai cakton ekspertin e jashtëm, një person me veprimtari të njohur shkencore në fushën dhe rajonin që është subjekt i artikullit.
2. Eksperti i jashtëm, mbasi pranon kushtet e kontratës për ekspertizën, e kryen atë sipas *kritereve të vlerësimit të dorëshkrimit dhe Formularit për Ekspertizën e Artikullit*, i cili është një material i miratuar zyrtarisht për vlerësimin e artikullit.
3. Rezultat i ekspertizës së jashtme është kategorizimi i artikujve në:
  - a. **Botim i pranuar me pak korrigjime (Minor revision).**
  - b. **Botim i pranuar me korrigjime mesatare (Intermediate revision).**
  - c. **Botim i pranuar pas ripunimit të thellë (Major revision).**
  - d. **I papërshtatshëm për botim (Rejected).**
4. Në bazë të ekspertizës së jashtme, hartohet një përgjigje për autorët përkatës ku i

njofton për vendimin formal për botimin ose jo të artikullit.

5. Në asnjë rast emri i ekspertit nuk bëhet publik për autorët e artikullit.

6. Nëse fshehtësia prishet nga vetë eksperti, përpara se ai ta dërgojë vlerësimin në Bordin Editorial, kjo konsiderohet si konflikt interesi, dhe ekspertiza quhet e papranueshme.

7. Pasi eksperti e ka dorëzuar ekspertizën, ai mund ta ndihmojë autorin për përmirësimin e mangësive, në rastet e botimeve të pranura të kategorive a, b apo c, dhe kjo nuk do të konsiderohet si veprim i gabuar dhe joetik.

8. Eksperti i jashtëm është i detyruar të konkretizojë përfundimet e tij për vendimet e kategorive a, b dhe c, duke orientuar autorët për përmirësimet.

9. Autorët kanë të drejtë të reagojnë ndaj vlerësimeve e të apelojnë vendimin pranë Bordit.

10. Bordi e shqyrton dhe cakton një ekspert për një vlerësim të dytë. Nëse vlerësimi i ekspertit të dytë është i njëjtë, vendimi i Bordit është i formës së prerë.

11. Ekspertët e jashtëm nuk kanë penalitete për mendimet e shprehura për vlerësimet e tyre.

### **Hyrja në fuqi**

Ky dokument, i cili përmban “Parimet udhëheqëse për Etikën dhe Estetikën e Publikimeve” hyn në fuqi pas nënshkrimit nga Drejtori i Përgjithshëm.

**Miratohet**

Drejtor i Përgjithshëm

**ADRIAN BYLYKU**

Tiranë 08/10/2025

